



## Rapport annual 2019 e 2020

Preziadas commembras, preziai commembers

Ils onns 2019 e 2020 han entschiet per l'uniun per la quarta e tschunavla gada cun igl Apero da Daniev ils 2 da schaner en casa da scola. Giuven e vegl han gudiu la cumpignia tier in bien apero cun specialitads da Vrin, in glas vin ni in auter refrestg ed ina ni l'otra canzun.

Igl apero da 2019 ha giu sco tema la cristaglia. Sin quell'idea era Martin Sgier vegnius perquei ch'Emil Frei da Ruschein haveva anflau sin l'Alp Ramosa ils 7 d'uost 2018 gronds cristagls. Ils 2 da schaner 2019 ha l'uniun astgau exponer in da quels cristagls. Admirar havein era astgau bials exemplars ord la vasta collecziun da cristaglia d'Anton Alig da Vrin-Dado. Il grond cristagl dad Anton Alig ed Odilo Demont da Vella che sesanfla oz en l'anteriura casa communal da Vrin, ha era buca astgau muncar tier l'exposiziun. Cun plascher ed interess havein tedlau las informaziuns ed anecdotes d'Anton sur dil cavar cristaglia.

Il tema digl apero da 2020 ei stau il Fondo Greina. Cunquei che la cumissiun Fondo Greina haveva ils davos onns survegniu mo paucas damondas per contribuziuns, havein nus puspei ina gada vuliu far attent sin quei fondo che possibilitescha sustegns finansials duront 40 onns (1997-2036). Gion Antoni Caminada ha risdau sco l'anteriura vischnaunca Vrin era vegnida tier questa donaziun e co ina gronda gruppa da personas - involvai ed interessai - eran sentupai ils 10 d'uost 1996 el Plaun la Greina per festivar en ina cerimonia il fatg che la Greina era vegnida declarada sco in territori da protecziun dalla natira ed aschia spindrada per la posteritad. Gion ha aunc saviu mintga detagl da quei gi ed aschia eis ei era stau per quels che tedlavan sco quei fuss stau pér ier.

Igl onn 2019 ha la radunzona generala dall'uniun giu liug ils 8 da mars 2019. Quella digl onn 2020 ha stuiu vegnir annullada. El mars 2020 ha il virus da corona midau la veta da mintgin da nus; tut anetg ei tut stau eri e quei per igl entir onn. L'uniun ha naven da quei mument buca pli astgau menar atras viadis ni occurrenzas.

Ils 15 d'uost 2019 havein nus aunc giu cletg e saviu ir sin viadi. Mo tuttina buca diltut sco planisau. La secunda part dil viadi ha stuiu vegnir organisada da niev in gi avon l'excursiun. La via a Juf era serrada pervia da malauras. Mo lein entscheiver davontier. 32 commembers dall'uniun ein sentupai la damaun sil plaz posta. Igl auto da posta cun il manischunz spitgava gia sin nus. Parti da Vrin essen nus dallas 10.00. A Vella havein nus fatg in stop per Christina Fischer. L'emprema destinaziun da nies viadi ha



menau nus a Fürstenau cun il Casti Schauenstein e la Casa Caminada nua che Renata e Carlo Caminada spitgavan gia sin nus. Cun els dus essan nus stai cumplets. Andreas Caminada, bein enconuschents e cun ragischs da Vrin, ha fatg in cordial beinvegni. Silsuenter ha Gion Antoni Caminada guidau nus atras ils edificis – vegls nuegls ed ina remisa - als quals el ha gidau dar ina nova veta cun ina brassaria da caffè, pasternaria, ustria, spensa, stizun e combras, schizun in tschaler da caschiel ei drizzaus en. Nus havein admirau il resultat da questas lavurs. Ella stizun ha in ni l'auter cumprau in paun ni tgei che ha gest fatg gust. In bien gentar ella Casa Caminada – salata da legums, furtem vadi, bizochels ed in dessert - ha terminau nossa viseta. Cugl auto da posta eis ei iu vinavon. Nua saveva mo la presidenta. Mo in ni l'auter ha sminau tgei che savess esser il proxim stop, pli damaneivel che nus essen vegni a Wergenstein cun il hotel Capricorn e siu Center Capricorn. Tochen dacheu havein nus giu in grond cletg cun l'aura. Il sulegl ha accumpignau nus igl entir gi. Pér si Wergenstein han nibels stgirs plaunsiu surtratg il tschiel. A Wergenstein havein nus visitau il Center da Capricorns en duas gruppas. In però da nus han fatg ina pintga tura a pei atras Wergenstein. Ell'ustria Capricorn essen nus lu tuts sesi ensemen tier ina marena cun platta freida. Cugl auto da posta eis ei suenter iu anavos a Vrin. Tuts parevan dad esser ualti staunchels mo fetg cuntents. Quei ei silmeins stau l'impressiun dalla presidenta. Il manischunz ha menau nus segir a casa. Entuorn las 19.00 eran puspei a Vrin. Quei firau ei veramein stau in gi da fiasta.

L'uniun Cuminonza Vrin dumbrava alla fin digl onn 2019 100 commembras e commembers ed alla fin digl onn 2020 102 commembras e commembers. Igl onn 2019 havein nus cun plascher astgau beneventar Manuel Caminada da Cons sco niev commember ed igl onn 2020 Viola Schuh-Paul che ha ina habitaziun da vacanzas a Graps 81, Vrin. Lucian Alig da Vrin fa dapi igl onn 2020 part da nossa cuminonza e l'entschatta 2021 havein astgau far beinvegni a Matias Alig da Vrin. El figurescha aunc buca ella statistica surmenziunada. Mo bunas novitads astg'ins adina annunziar ad uras. Demissiunau ha il vischin Emil Caviezel sin entschatta 2019. El ei staus in commember dall'empresa ura. Nus engraziein ad el per haver fatg part da noss'uniun e giavischein ad el tut bien e buna sanadad.

Ulteriuras bunas novitads da nos commembers: Cornelia e Ronnie Caminada-Schiebel ein maridai ils 17 da mars 2018, Tania e Martin Sgier-Caminada, ils 26 da schaner 2019 e Simona e Maurus Blumenthal-Caviezel ils 28 da fenadur 2020. Naschida ils 12 da mars 2019 ei Ilenia da Tania e Martin Sgier. Ils 26 da schaner 2021 ein els vegni geniturs d'ina secunda feglia, la Larina. Nus gratulein a tuts cordialmein. Forsa dess ei aunc novitads dad autras commembras ni auters commembers. Denton



ein quels buca enconuschents a nus. Nus gratulein era a tut quels sin quella via cordialmein.

Igl onn 2019 ed igl onn 2020 entochen il mars han sesidas aunc saviu vegnir fatgas senza mesiras da protecziun. Sco mintg'onn ei la suprastonza dalla Cuminonza Vrin s'entupada el 2019 ed el 2020 cun la cumissiun Fondo Greina per decider sur dallas damondas per contribuziuns. Ulteriuras sesidas han giu liug per sediscuorer pertuccont igl Apero da Daniev. Cun ina tscheina ha l'uniun saviu dir engraziel als dus revisurs, ils commembers dalla cumissiun Greina e d alla suprastonza. Ils 15 da fevrer 2019 essen nus stai a Cumbel ell'ustria Larisch a tscheina ed ils 6 da mars 2020 ell'ustria Lags a Laax. Nus havein giu legher cun excellentas spisas.

Sco finiziun admittel jeu a mes consuprastonts Martina Caviezel e Martin Sgier ed als commembers dalla cumissiun Greina Evelyn Casanova, Arno Pelican e Pieder Alig ed als dus revisurs Rosvita Alig e Silvio Caviezel in cordial engraziament per lur lavur per la Cuminonza Vrin. Oravontut a quels che dattan giu lur uffeci sin la fin digl onn 2020 e quei suenter biars onns da lavur en survetsch da noss'uniun. Ei setracta da Martina Caviezel, Evelyn Casanova, Rosvita Alig e Pieder Alig. Nus giavischein a vus quater mo il meglier per il futur e sperein sin in seveser ad ina ni l'otra occurrenza.

Plinavon s'auda in grond engraziament a tuts che han segidau sin ina moda ni l'otra. Engraziel era a Vus tuts che fageis part da noss'uniun, che steis fideivels ad ella e che tgireis nossa cuminonza. Nossa uniun sesanfla aunc adina en ina «sien da Rosaspina». Jeu sperel fetg che nus sappien sentupar aunc quest'onn ni sil pli tard per igl Apero Daniev 2022 per sesvegliar danovamein e surtut cun giuvnas forzas ell'uniun.

Vrin, ils 30 da matg 2021

La presidenta: Andrea Portmann